

ՊԱՏՄՈՒԹԻՒՆ Ս. ԵՐՈՒՍԱՂԵՄԻ

Գ Լ ՈՒ Խ Ա .

Ծնունդ Տեառն մերոյ . Գալուստ Մոգուցն . Կոտորումն մանկանց :
Յովհաննէս մկրտիչ . Հերովդէս . Աբգար . Պիղատոս . Հրեշտակք Աբ-
գարու : Մկրտութիւն Տեառն և քարոզութիւն նորին մինչեւ 'ի համ-
բառնայն յերկինս :

ՅԱՄԻ քառասներորդի կայսերութեանն Հռոմայ Օ-
գոստոսի և յերկրորդի թագաւորութեանն Հայոց Աբգա-
րու յեգեսիա , եւ յերեսներորդի եօթներորդի թագաւո-
րութեանն Հրէաստանի Հերովդէի մեծի Ասկաղանացւոյ ,
« Եւ հրաման 'ի նմին իսկ Օգոստոս կայսերէ աշխարհագիր
առնել ընդ ամենայն տիեզերս » . որպէս սլատմէ Աւետա-
րանագիրն Ղուկաս : Ելին և սիռեցան գործակալք ինքնա-
կալին ընդ ամենայն գաւառս տէրութեանն , ածեալ ըզ-
սլատկեր նորին Օգոստեայ կանգնել 'ի մեհեանս գից մէն մի
ազգաց : Ի սմին ժամանակի ծնաւ Փրկիչն մեր և ամենա-
կալ թագաւորն Յիսուս Քրիստոս անձառելի և անապական
ծննդեամբ՝ յանարատ կուսէն Մարիամայ 'ի Բեթղեհէմ
Հրէաստանի՝ յանչուք և 'ի գծուծ այրի , սլատեալ 'ի խան-
ձարուրս եւ եդեալ 'ի մսուր անբանից : Զի սուրբ կոյսն
Մարիամ եկեալ էր ընդ Յովսեփայ 'ի Նազարեթէ մտանել
յաշխարհագիր 'ի քաղաքի Դաւթի : Հովիւքն բացօթեայք
աւետեօք հրեշտակաց տեսին զհին աւուրցն մանկացեալ
'ի գիրկս կուսին : Թլխատեցաւ ութօրեայ , եւ կոչեցաւ
անուն նորա Յիսուս՝ ըստ կանխասաց բանի հրեշտակին :
Աստղն նորատեսիլ եղեւ առաջնորդ Մոգուցն արեւելից ,